

Trend artis zaman siber

» Guna Twitter, Facebook luah rasa, cetus polemik dalam industri hiburan

Oleh Nor Hatina Shuib dan Fatim Farhana Ariffin
bhhibur@bharian.com.my

Evolusi teknologi maklumat dan komunikasi (ICT) menyaksikan karyawan seni memanfaatkan media baru sebagai medium merapatkan hubungan dengan peminat.

Artis kini cenderung menggunakan aplikasi terkini seperti Facebook dan Twitter termasuk Myspace dan Friendster yang cukup popular suatu ketika dulu, bagi meluahkan perasaan. Melaluinya, artis bebas meluahkan apa yang terbuak dalam hati, sama ada membabitkan kisah peribadi atau kerjaya dengan meraih reaksi spontan peminat.

Senario artis meluahkan pandangan dan berkongsi emosi dalam Twitter, mencetus persoalan menarik untuk diperdebatkan terutama dalam konteks baik buruknya amalan itu.

Sebelum ini, beberapa artis di Malaysia 'hangat' dengan luahan Twitter seperti yang dilaporkan berlaku kepada pasangan penyanyi, Shila Amzah dan pelakon, Sharnaaz Ahmad. Tidak terkecuali, adegan merajuk Remy Ishak dengan Tiz Zayyah yang didakwa melayannya seperti sampah serta tidak memberi perhatian ketika dia sakit.

Pakar motivasi, Prof Madya Md Izuddin Ali, berkata laman sosial kini menjadi 'diari maya' bagi artis berkongsi perasaan dengan peminat.

"Artis juga manusia biasa, tetapi jika terlalu mudah meluahkan maklumat, perlu bijak menghadapi kesannya.

"Ini kerana setiap apa yang diluahkan melalui medium itu

akan menjadi perhatian umum terutama peminat yang mungkin akan menjadikan isu terbabit lebih sensasi," katanya kepada Skop HIP.

Md Izuddin berkata, artis perlu memberi pertimbangan sewajarnya sebelum berkongsi perasaan dalam Twitter atau laman sosial lain.

"Jangan guna emosi, takut mengugris hati pihak lain hingga wujud kes saman-menyaman pula," katanya sambil menambah kebebasan menggunakan media baru untuk meluahkan perasaan dianggap hak peribadi artis yang tidak boleh dihalang.

Penyanyi Shila Amzah yang pernah terpalit dalam isu luahan cinta antaranya dengan Sharnaaz yang dikatakan disampaikan bersahaja dalam Twitter berkata, kemudahan itu dianggap medium terbaik untuk berkomunikasi dengan peminat.

"Soal tweet saya bersama Sharnaaz, ada yang suka dan yang tidak suka. Saya tak hiraukan perkara remeh begitu.

"Jika ada yang tidak berpuas hati, saya akan jawab secara sinis. Jika ada yang tidak mengemari tweet saya, anda ada hak untuk tidak membacanya," katanya yang mengelak meluahkan perasaan dalam Twitter jika emosinya terganggu bagi mengelak kesan negatif.

Gaya hidup baru

Kecenderungan menggunakan media baru untuk melepaskan geram, tidak puas hati, berkongsi kisah cinta atau bergaduh sesama sendiri dilihat suatu elemen gaya hidup masa kini yang turut melanda artis.

Ketua Jabatan Pembangunan Manusia Pengajian Keluarga, Universiti Putra Malaysia (UPM), Prof Madya Dr Rumaya Juhari berkata, amalan seumpama itu boleh meraih perhatian peminat dengan lebih mudah.

"Umumnya, laman sosial membolehkan individu mencipta satu 'profil diri milik awak' berinteraksi dengan teman yang dikenali dan tidak dikenali berasas kepada minat sama.

"Dalam hal ini, artis dan pengikut hanya 'memeriahkan' acara itu saja," katanya.



"Kadang-kadang orang selalu fikir dunia artis ini glamor dan indah-indah saja, jadi kadangkala dapat meluahkan perasaan mengenai sesuatu situasi melalui Twitter adalah bagus"

Dafi,
Penyanyi

"Berkongsi perasaan itu tidak salah, tetapi janganlah sampai mengabaikan mana-mana pihak. Saya menggunakan Twitter sebagai tempat berkongsi perkembangan terbaru saya dan Forteen"

Ariz,
Anggota Forteen



PENDAPAT AHLI AKADEMIK



"Keinginan mencapai kepuasan peribadi, mahukan perhatian, kekal popular, dipuja walau ada masanya dikeji, bersaing selain mahu meluahkan rasa antara dorongan psikologikal menjadi faktor artis meluahkan rasa di alam maya"

Prof Madya Dr Rumaya Juhari,
Ketua Jabatan Pembangunan Manusia
Pengajian Keluarga, UPM

TWITTER ARTIS



'Dalam studio rakaman.'

Bruno Mars,
Penyanyi



'Warga negara dunia, darling!'

Mariah Carey,
Penyanyi



'Individu yang paling gembira tidak beroleh segala yang terbaik.'

MaherZain
Penyanyi



'Akhirnya saya ada akaun Twitter dan saya melompat'

Madhuri Dixit
Penyanyi



'Merindui kamu adalah hobi saya. Menjaga kamu adalah tugas saya. Membahagiakan kamu adalah tanggungjawab saya. Mencintai kamu adalah kehidupan saya.'

Foziah Gous
Pelakon



'Seorang insan, suka bermimpi, bersemangat dalam kerja, berdedikasi kepada keluarga dan mencintai Tasha Shilla's Team.'

Tasha Shilla
Pelakon